

清光緒朝中日交涉史料

卷廿七之卷廿八
二十年

國史綱目卷之四

卷之四
三十一

清光緒朝中日交涉史料卷廿七

(二二五六) 北洋大臣來電

光緒二十年十二月初一日到
電報檔

密卅電悉二十八有倭兵船一隻在榮成之龍鬚島上岸探聞旋即折回南駛查威海南距龍鬚俚島一帶百餘里後路甚長萬山叢雜非守口礮臺所能分隊遙擊已嚴飭威防水陸將領俟賊近岸卽相機雕勦鴻東已

(二二五七) 盛京將軍來電

光緒二十年十二月初一日到
電報檔

本月二十六日奉二十三日電旨伏查海城失守遼陽卽三面受敵長順現抵遼陽督所部並蔣尙鈞所部豫軍顧遼陽西南面通海城之路聶士成呂本元孫顯寅等軍及耿鳳鳴三營扼守下馬塘大高嶺連三關等處顧遼陽東南面通鳳岫之路依克唐阿軍與富林布倭恆額等營現在分水嶺礮廠興京一帶扼賊由鳳凰城繞越北犯之路張錫鑾所帶之營除已調遼三營外七營分紮懷仁通化興京七營扼賊由寬甸東北竄犯之路所防皆緊要處所現耿鳳鳴營紮連三關正當東路之衝張錫鑾營亦紮防護興京要地均勢難抽動近幸唐仁廉招成馬步三營由錦州將次到省會商擬將該提督已到之營同省中現有各隊並

將聶桂林原帶九營內抽回四營由唐仁廉與裕祿逐細挑選更換速加整頓籌布瀋陽防守並爲遼陽後路策應一面會商長順將未調省之聶桂林五營及豐陞阿所帶各營由長順在遼陽趕爲整頓汰弱留強分撥調遣刻下賊蹤四竄軍情變幻無定裕祿惟有與長順唐仁廉聶士成等隨時相機商酌調派竭力籌布防剿至謝永恩所辦團練現在大高嶺一帶隨同呂本元防守此縣寬鳳交界一帶有宮意如王咸基蔣天福陳國恩等團練遼陽界有謝永恩徐珍程克昌魁福沈宗漣錫壽朱登甲等團隨軍助剿可與官兵相輔均尙稱得力惟槍械不多難持以專任戰事依克唐阿所派榮和招募十四營先後均已到齊俱抵依克唐阿軍營理合電陳裕祿勘

(二二五八)軍機處電寄裕祿諭旨

光緒二十年十二月朔一日
電寄檔

奉旨裕祿電奏大高嶺爲遼陽東路門戶現在賊隊仍踞草河口聶士成呂本元孫顯寅等軍未便移動等語自係目前實在情形卽著裕祿飛咨宋慶另行籌調並飭知聶士成等仍嚴扼大高嶺以杜賊西竄之路現在瀋防喫緊無兵可調裕祿應懷遵前旨分飭各屬趕辦團練旣資禦侮兼可肅清伏莽近年奉省冊報尙有庫存銀四十萬兩如辦理軍務經費不

數卽於此項庫存先行給發再由戶部撥款歸還欽此十二月初一日

(二二五九)直隸總督李鴻章彙報前敵緊要軍情摺

光緒二十年十一月二十九日

革職留任大學士直隸總督一等伯臣李鴻章跪奏爲彙報前敵緊要軍情恭摺仰祈聖鑒事竊自倭人構衅徵調繁興所有籌辦事宜及逐日軍報疊經臣先後具陳及隨時密電總理各國事務衙門轉奏並奏明前敵偵探布置接仗各情形關係緊要隨時電達以期迅速仍將各電分日摘錄或一句或半月彙齊奏報一次以備稽查十一月十二日以前業經開單奏報在案茲將十一月十三日起至二十七日止照錄各電彙繕清單恭呈御覽理合恭摺具奏伏乞皇上聖鑒謹奏光緒二十年十二月初二日奉硃批知道了單留覽欽此

(二二五九)附件一 前敵緊要軍情各電清單

謹將前敵軍情緊要各電自十一月十三日起至二十七日止擇鈔恭呈御覽

豫撫劉樹堂電鄂軍於初八九日催趲出境李永芳之軍刻想到京牛師韓招足七營准十五日起程後有過豫之軍催迅進希轉電云十一月十三日己刻

倫敦電中國在倫敦借款一百餘萬鎊每年行息四釐半將次成事又倫敦新報英太子在俄京所辦之事實與英國大有裨益又俄國派兵船三艘前赴中國海云 十三日午刻

丁汝昌元電徐建寅昨到威今日過島歷勘水師各船情形後據云明日回烟台本日五點半鐘倭有一船由西來抵東口巡探趙北嘴礮台共開六礮內有一礮中其煙筒一礮中其船後行駛遂滯天黑不獲派船出口擬明早派雷艇查勘如果倭船因傷沈沒再續電聞又威海北岸戴宗騫電申刻有倭船一艘由東來過北山嘴甫開礮即速駛過繞南口趙北嘴台開四礮雨霧看不甚清劉公島登山瞭見第二三礮打中即北走貓頭山後隨約有四五艘至晚均不見仍飭嚴防又威海南岸劉超佩電十三日下午有倭船兩隻一商船一兵船離南口趙北嘴不遠二十八生礮打七千五百密達打六礮頭礮未中第二礮中煙筒第三礮中船後身第四礮亦中船後第五礮六礮賊船去遠丁提督在劉公島山上看見云

十四日己刻

臬司周馥元電近聞宋帥主勦而不主守然以蓋平居中扼要而不能離須俟敵來攻始合諸軍痛擊仍是守局章高元欲趁此寇未整備時先進攻亦恐攻不及遠不能傷敵元氣初擬唐吳李三軍速來爲宋後路援應分紮海城牛莊營口及海蓋居中之大石橋藍旗廠等

處今聞唐仁廉赴瀋吳鳳柱在錦李光久尙無信來僅二營到營口此等軍本雜湊而心不齊今復逗留不前恐倭大隊到蓋宋部難以久敵大約倭來斷不止一股輕快礮必多尙宋部再敗全奉俱震近日摩天嶺以北雖嚴防而中路馬金鉞蔣希夷等軍究嫌兵單豐聶聞風卽潰騷擾不堪前蔣馬來信謂此軍有不如無因商善道請宋帥將豐調瀋交定帥整頓聶桂林紮遠處宋未復倘析木城一帶或被寇抄則宋部南北受敵守且不易請催唐吳李仍遵旨速來爲宋後路援應蔣尙鈞原派宋調遣後經裕帥調瀋嗣又調防摩天嶺後路聞蔣爲人渾噩難獨立可否電商仍歸宋調或歸蔣希夷暫調以固中路現瀋防似無須蔣摩嶺後路亦不甚重乞酌行云鴻查吳鳳柱馬隊五百係舊營新募步隊四營尙未操練今奉旨飭駐錦州要地以操爲防尙屬相宜李光久二營航海至營口其三營改由山海關陸路因車難僱未報起程蔣尙鈞前本奉旨歸宋慶調遣唐仁廉旣赴瀋應請飭裕祿仍令蔣歸宋調遣以厚兵力請代奏 十四日巳刻

劉含芳電有蓬萊船戶劉洪昌初五日由皮子窩開船昨日到據稱廿八在皮子窩見到倭船六艘用小船渡兵四五百登岸廿九又上五六百海灘泥深皆裸體而上兩日凍死四人現住市間並未移動云 十四日申刻

聶士成電十二日由通遠堡帶隊追探倭賊至午刻遇敵於金家河卽飭夏青雲帶馬隊攻擊傷斃倭賊數十名我兵受傷無多追趕二十餘里現倭步隊退守雪站西嶺山頭接應士成親駐土門嶺一帶加意扼守相機進剿云 十四日戌刻

賈起勝電早八點鐘由西南來賊船三艘當派左軍兩營中軍左營趕赴金山嘴扼要佈置右軍兩營中軍副營守河西長牆自帶中軍正右兩營守洋河口長牆礮臺佈置已定見續來二艘其稍小者離岸八里均泊一點鐘時往金山嘴而行起勝飛馬先赴該處見礮已設放妥當少頃賊船離岸六七里停半點鐘卑軍礮力不能透堅未擊見其全往東去云

十四日戌刻

袁世凱自新民廳電各軍由西路將至事必繁擬明日行昨據錦州轉運局周冕稱錦匪甚多請派弁勇協捕清運路擬先至石山站就近派人往石距雙臺近便照拂已飭王慶保金大廷等妥辦在新照料糧醫各事再瀋西土匪蜂起迭被刼傷殊爲後路患云

十五日辰刻

丁汝昌電定鎮兩艦原係徐建寅監造昨來威勘驗所論悉中機竅戰守機宜頗知要領忠勇之發溢於言表可否奏派留船或爲提督幫辦或作監戰大員良多裨益云請代奏

十五日己刻

依克唐阿電十一日派隊分道進勦十二日辰刻阿親率馬步行抵下馬塘探知聶總統業已出隊派統領扎克乃布烏勒興額由吳家後溝會勦十三日巳刻正在通遠堡與聶總統晤商適扎烏兩統領帶隊亦到並據壽山永山報稱連日在崔家房白水寺謝家堡等處與賊接仗賊且戰且退會合賽馬集竄出之賊共計二千餘人在四顆戴據險死拒我軍亦分搶山頭戰歷兩時賊勢不支立即潰敗現已追至龍灣計斃賊百餘名生擒數名奪獲器械無算我兵陣亡受傷尙未查明查龍灣地最險該賊既大股死守亟應添兵會同聶總統進攻鳳城以破巢穴而分賊勢刻已督催前進以期一鼓撲滅又呂本元電十二日率馬隊之魏金堯李家修周永發劉聚球追賊至金家河賊隊拒據長嶺子山頂設有大礮多尊防禦甚嚴趕會商依將軍聶士成合隊追剿本元未帶步隊隨卽知會孫顯寅調盛軍各營所挑奮勇百名飭該營官於十四日齊至通遠堡帶往合勦約定十六日抵鳳城但不知長嶺子賊股是否能一鼓殲除云 十五日己刻

山海關礮臺卡得祥電頃有倭船三艘六點鐘由東南來折向西南距關約廿餘里已電各處並飭各臺嚴防云 十五日戌刻

劉含芳諫電今日有天津民人王煥初九日自旅逃出據稱自前月廿八日起倭大隊紛紛向北五六日未已現在倭兵不多前後營臺各或百餘或數十共計二三千人自初一日起由北來旅傷亡之倭兵每日百餘皆用高麗人擡並沿途僱民人幫擡到旅上船裝回該國聞其陣亡者凡高麗兵概不收埋又聞倭兵傳言北路宋帥各軍不似從前的兵前在平壤的兵遠見槍礮卽退近來打到近身猶向前進實在利害可惡不容易打必須再添幾萬兵往北打等語前月廿五六七八等日搜山廿九日卽不殺人旅東西廠倭人於初一日升火開機修槍礮口門民船只准出不准進各等語被留民人皆令挑水搬物給以布條上寫順民之證等字縫等於衣襟等語 十七日辰刻

聶士成等諫電十三晚士成本元顯寅同依帥會商分路進取鳳城士成先帶馬小隊偵探前進一面派弁回嶺防調隊隊尙未至驟有倭馬隊數十由雪里站探來士成遂令夏青雲同盛軍馬隊夾擊戰有時許忽倭兵步隊翻山而至我馬隊正在難支幸依帥步隊適至接應依帥及士成等親冒子彈由已戰至西倭兵有進無退我軍因援隊未至不敢戀戰依帥遂撤隊至草河城士成等撤隊過通遠堡夜守山頭十五早倭賊復添隊來草河口老虎嶺一帶爲嶺防要隘且草河口沿路民房前被倭兵焚燒防守爲難士成等恐受包抄遂飭各

軍仍各守原處聞倭隊此來係新添大股頭隊約有三千餘衆俟確數查明再稟云

十七日辰刻

吳鳳柱諫電元電諭旨自應欽遵辦理頃據探報高橋以北有馬賊百餘前因柱軍過境儘數竄往錦州正西五十餘里之虹螺縣西北七里之紅龍山地方又錦州正西九十里之沙鍋屯另有馬賊一股又錦州西北五十餘里之班吉塔九十餘里之暖池塘正北七十餘里之沈家台劉龍台等處皆有馬賊聞此數股人數不多或百十人一股或數十人一股內多由山東竄來勾同本地土匪滋事或搶市鎮店鋪或刼過往車輛時散時聚卑部馬隊三營現已過石山站刻經飛檄調回擬卽飭赴虹螺縣地方分路緝捕所有步隊四營擬分紮錦州東關外雙陽店小凌河甸等處以資彈壓藉可探聽前敵情形餘情統俟續稟云鴻已電覆趕派馬隊勦清各處土匪以靖內患而通運道並嚴防各海口 十八日辰刻

倫敦電上海來報據日本云中日如要議和中國須將前懸賞格購殺日人之官員先送東京然後定約又中國在倫敦借款現已罷議又託阿墨士莊借款亦難就緒因中國另向別處請貸其利息較大故此不行云 十八日己刻

滬局沈能虎電西探倭於十一月廿六號購一英輪爲運船名金州丸倭主令駐廣島兵弁

勤習華語倭兵部擬派通曉測量者二百四十人至華測丈新得華地並由義州設行軍電線至大連灣已工竣由平壤至大東溝鐵路十一月十八號開工云 十八日己刻

倫敦得橫濱電報日本已進攻奉天雞鳴瑪島日本第二隊軍馬窮追中兵到復州因第二隊係頭隊接應故魚貫而行云鴻查宋軍到蓋平後復州並未駐兵倭人動多誇飾類此其頭隊則指山縣有朋所統鳳岫之軍 十八日未刻

臬司周馥關道善聯嘯未電岫巖賊於十三四等日北竄雖有豐聶馬各軍駐紮其間豐聶向不能戰於十五日爲賊追過析木城退守海城倭亦踵至海城卽於十七日申刻失守馬營官金鉞尙不知退守何處蔣提督希夷另拒倭於廟兒嶺烟臺等處距營口約七十八里力戰兩日據探恐受包抄而後無援師營殊可虞云 十九日辰刻

袁世凱電刻抵石山站周臬司囑催提餉械及料理設電各事卽分派員弁辦十五日途遇唐提督稱赴瀋會辦軍務督旗兵守陵寢云 十九日辰刻

海城失守爲遼瀋線路所必經昨午據報線爲倭斷瀋報不通卽遼陽大高嶺各軍信息亦阻殊爲焦慮現擬令錦局專馬送軍報至瀋路遠恐難遽達 十九日己刻

營口善聯急電頃接宋帥十九日飛函慶現抵大石橋據探並百姓云海城倭匪甚多城內

外山頭及城頭均設礮位防我甚密並有竄牛莊營口之說慶明早率隊至缸瓦寨該處距海城三十里距牛莊亦三十里如賊尙踞城當設法勦辦遏西竄之路倘已赴牛莊慶當乘其後痛勦令轉電等因善聯並據探稱倭人一千餘三百犯牛莊三百餘往營口三百餘到高坎石歷子一帶俱距營三四十里云 二十日己刻

周馥廿電海城已失藩電不通嶺軍又喫緊已囑遼運局將餉械分移新民廳以後遼運路阻嶺軍難接濟宋帥率銘毅各軍北勦海城一股而留章高元劉世俊等防蓋東兼遏南路未免兵分力單指日大戰卽勝而營口以西空虛恐倭又襲故智抄宋軍後路現河凍處處可通守固無益勦亦不能速進不知近日有何軍出關援應大局殊可慮云查李光久三營因車難僱今日始由關啓程陳湜十營甫整行裝輜重難運尙未據報行期祈電旨飭催 二十日己刻

營口局午電刻據距營五十餘里之連山屯會首來報十八日賊騎十四匹到該處用炸藥毀桿二根線卽帶走賊騎出沒靡定且恐所毀不止一處卽選奮敢工匠三名許給重賞星夜趕修云 二十一日申刻

章高元電十九早宋帥統毅軍銘軍劉世俊嵩武軍由蓋攻海城派高元與徐邦道程之偉

張光前等軍守蓋平卑軍紮蓋東三十里之牽馬嶺一帶十七賊來撲幸卽擊退現賊隊一千餘人踞高家屯距牽馬嶺十餘里時來游弋高元督各將士日夜輪伏林奔中宋帥令駐蓋州城外此時與賊相持斷不敢邊撤恐失險爲賊所乘現只八營堵東路已形兵單勢難抽隊再顧南路而南路雖有徐程張三軍尙復州大股來犯甚爲可虞云 二十一日戌刻

袁世凱馬電聞倭探馬已至牛莊賈河一帶距海城北卅里又聞摩天嶺海城蓋平三路均有倭大股分道來犯倭至海城入平地分防甚難似惟有合力迎擊可冀一捷云

二十二日辰刻

陳湜電馬電奉旨嚴催敬悉卑部奉調已經三日軍火糧餉需車運載乃兵差絡繹屢催不應無可爲計今奉嚴旨湜祇得於廿四日親率一營啓程如竟無車輛卽帶親兵數十名先往錦州等候各營陸續進發求先行電奏仍嚴飭轉運局速辦車輛俾各營得以開拔云臨榆民車經唐吳李譚各軍及前敵轉運餉械僱用殆盡雖出重價亦辦不來現催飭永屬各州縣協濟准其領價 二十二日戌刻

昨令袁世凱專馬函告聶士成等同軍設法夾擊海城大股頃接電覆昨今派馬三起分赴探告聶呂並電宋帥遣人繞海城北約聶呂夾擊必可達惟尙無復音今早得昨探毅軍已

至宋仍在太石橋未聞接仗云 二十三日午刻

周馥禡電摩天嶺東近亦來大股嶺距營口田莊台四百里前日已派人送信囑聶呂固守
非宋帥調勿輕退緣嶺西至遼陽僅一百廿里遼至瀋一百廿里若摩嶺不守則遼瀋難守
而海城一股與嶺東一股合則勢更大海城一股更難剿且海城北旗隊尤難合軍必望風
而潰現函商宋帥預籌聶呂退步免致臨時潰亂此時祇好守一日保一日惟接濟甚難一
月內糧彈似可敷衍且看近日海城戰事如何若此時調聶呂夾擊海城賊相距二百里必
來不及云所論甚有見惟宋慶養電已飭聶呂孫等軍向南夾擊合併一路相機攻剿依長
各軍未知能扼摩嶺遼陽否 二十三日午刻

吳鳳柱電錦州西北土匪蜂起深恐遙爲倭寇聲援截我運道查該匪或數十人一起或百
人一起多有乘騎攜帶快槍以致附郡人心惶惶紛紛遷徙柱卽派隊四處遠近搜捕該匪
半爲建昌朝陽一帶不逞之徒犯有重案無處容身逼而爲匪錦屬土匪爲之羽翼勾引而
來窩藏處所亦無一定探聞官軍出入以爲向背而錦屬西北崇山峻嶺道路紛歧以致剿
無可剿徒煩兵力柱籌思至再前路軍情萬緊警報頻來此等匪徒若不早日掃清難免不
爲倭寇所用爲害更巨因與地方文武城鄉紳董熟商妥籌消息良法因派將領王有宏畢

道衡等以及向爲鄉里推重富紳王錫侯等尋出眼線分途百方開導力保投誠以後不咎既往數日來已將錦縣所屬之紅龍山建昌所屬之沙窩屯兩處之匪陸續招安一百八十五人脅從三十四人繳呈快槍五十一桿刀械百餘件又慮該匪狼子野心反覆無常諭令該紳等具保茲各具切結願以身家相保自屬可信因思前敵極不得手各營潰散甚多當此用人孔亟此股匪徒一經收撫遠近傳聞將來自必接續來歸擬暫收五百人編爲一營揀派得力將領統帶既可消彌內患又可抵禦外侮惟餉項無出可否仰求設法籌措云云似應准其收撫認真訓練飭由糧臺照章給餉請代奏 二十四日巳刻

宋提督漾電刻據探報金旅大股約萬餘人十七日至葶蘭店行路寬十餘里漸向北來等語海城倭亦令各鄉多備糧食云廿四五後路衆兵過此是東南兩股合竄之謠不虛慶祇此兵力勢難堵其分竄聶士成等軍一時恐難卽合且未知摩嶺情形如何倭旣堅踞海城未能旦夕卽克又慮彼分出肆擾糧路缸瓦寨無險可守糧彈無多且積雪甚厚兵勇日在雪地防範倘後路一斷糧彈不濟更難措手慶擬駐紮牛莊以通運路可就田莊臺營口之糧並調徐邦道所收之五千人亦到牛莊以厚兵力惟蓋平只餘章高元張光前兩軍兵亦太單勢逼處此無可奈何且徐邦道軍械不過五成只可分班輪用該軍棉衣亦尙缺乏擬

俟恩賜毅軍棉衣解到田莊臺先行撥給濟用合先電陳請酌奪代奏云鴻查所慮亦是

二十四日已刻

營口局電宋帥昨晚退守牛莊道署已遷徙一空惟道廳未走云 二十四日未刻

善聯本日電宋帥昨與倭戰未能得手遂退至牛莊營口東面空虛敵氛已逼惟有設法彈壓土匪保護租界及稅款苟能保一日安總當竭一日力又袁世凱子刻電據宋帥電稱已專馬飛函繞道至大高嶺調聶呂會合廿二親率各軍至離城十五里接仗互有傷亡賊退於庚王山亮甲山均設礮禦我未便窮追擬次早再進適又有分股千餘載礮西趨恐抄我後是以仍回缸瓦寨以備分剿又據探稱賊在八里河約有五千昨宋帥已與開仗彼此相擊賊繞道抄我後路宋帥亦繞道抄賊後路彼此復又相擊斃賊多名賊退至海城一千餘仍在八里河據守云又午刻電頃據田莊臺探電稱前敵消息不好敗兵已有來田者似乎又潰如不截堵勢又潰數百里已電田局員商同湘營官設法防截候其本管官來收並分派員弁擇要堵阻然平地路太多已飛告周臬司分截云 二十四日申刻

章高元徐邦道等電現賊踞海城大石橋一路空虛高元等會商何路喫緊堵何路並互相接應不敢稍懈又會商程之偉一軍駐青石關力顧北路有事亦互相援應云 二十四日戌刻